

Epetoidi inänite Pabodo nänö cadota ante yewæmongainta

Waa quëwencæminimpa, ante

¹ Wængongui angä ëñëninque Itota Codito botö imote da godongä gogaïmo inte botö Pabodobo inömö inte yewæmömopa. Epeto inömö quëwëmini incæ minitö Wængongui quimini inte Itota Codito nempo quëwëninque në ædæmö cæte pönëmini inöminite botö, Minitö acæminimpa, ante yewæmömopa. ² Mönö Mæmpo Wængongui tönö mönö Awënë Itota Codito piyænë cæte waadete pönö cæda ate minitö gänë pönëninque waa quëwencæminimpa, ante yewæmömopa.

Codito nempo quëwëninque mönö eyepæ ëwocamompa

³ Mönö Awënë Itota Codito Wæmpocä inongante Itota inömö adocä ingantedö ante, Botö Wængongui inongä ingampa, ante apænegacäimpa. Inique mönö inömö Codito tönö do öönæde æite bai tömengä nempo quëwëñömonte adocä Itota Wængongui incæ tæiyæ waëmoncoo në ëwocagaingä inte pönö cæcä æninque mönö tömengä nänö ëwocadoncoo tömancoo bai adobai eyepæ pöni ænte ëwocamompa. Mänömaï cæcä adinque mönö tömengä ingante apænedinque, Bitö waa pöni cæbi æmönipa, ante watapæ apænecäimpa. ⁴ Tömengä inömö edæ, Codito nempo quëwëninque minitö botö ayömo edæ tæiyæ waëmö ëwocamini inte edæ wentamö mongænämaï incæminimpa, ante tömengä inguipoga nänö badönämaï inedë incæ mönö imonte pönö apænte ængacäimpa. Ayæ mönö imonte waadete pönëninque tömengä, ⁵ Botö pæpogate bai æmo beyænque minitö

ĩñömö Itota Codito nempo quëwëninque botö wëmini baquĩmini incæminimpa, ante cædinque tocæboimpa, angacäimpa. ĩnque tömengä doyedë nänö angainö bai cædinque pönö angä ate mönö Wængonguĩ wëmö cöwë baquënëmö ingamöimpa.

⁶ Edæ nanguĩ waadete pönö cædinque tömengä nänö në Waadecä ingante da pönongä æmompä. Mänömaĩ beyæ mönö ĩñömö tömengä ingante, Bitö ñäö apäite bai ëmönömi inte mänömaĩ waadete pönö cæbi æmönipa, ante watapæ apænecäimpa. ⁷ Edæ tömengä nänö në Waadecä ĩñömö mönö imonte æncæte ante nämä wepæ godonte ængä beyænque mönö abæ tawænte quëwë-mompä. Ayæ adobai tömengä wepæ inte ñä mënongacä beyænque ëñënamai mönö cædö ante Wængonguĩ nanguĩ waadete pönö cædinque ñimpo cæcä quëwëmöimpa. ⁸ Tömengä ĩñömö edæ, Æbänö i, ante tömänö ante në ëñëmongä inte, Æbänö cæquĩ, ante edæ nöingä ëñë-inque mönö beyæ ante godömenque nanguĩ pönö cæcä æmöimpa. ⁹ Ayæ edæ, Codito tönö guëa cædinque nämä botö änö bai cæte tocæboimpa, ante Wængonguĩ angacäimpa. Tömengä mänömainö ante nänö wëmö ĩñömö angainö ante mönitö imönite ñöwo edonque pönö odömonte apænecä ëñëmönipa. ¹⁰ Tömengä, ĩñedë cæcæboimpa, äninque tömengä nänö angaiñedë ĩinque ba ate tömengä nänö angainö bai edæ ĩinque cæcæcäimpa. Edæ öönædë ongoncoo tönö inguipoga ongoncoo tömancoo tē gæte mämö adocanque nempo Codito Awënë nempo godömo æncæcäimpa, ante cæ-campa.

¹¹ Nämä pönente nänö angainö bai tömänö ante adobai pönö në cædongä inte Wængonguĩ, ĩimai cæcæboimpa, ante pönente ate cöwë cæcampa. ĩnque tömengä, Codito nempo quëwënäni inänite æncæboimpa, ante

nänö pönente angainö bai cædinque, Minitö Codito nempo quëwenguimîni incæminimpa, ante pönëninque mönitö imönite apænte ængacäimpa. ¹² Mönitö, Codito beyæ watapæ bacæimpa, ante täno pönëmöni inönönite tömengä, Botö nãö ëmönö ante watapæ apænemîni bacæminimpa, ante mönitö imönite pönö apænte ængacäimpa.

¹³ Ayæ, Codito pönö ængä beyænque mînitö quëwencæminimpa, ante Wængonguï watapæ nänö apænegaïnö ante ëñente pönëninque mînitö epeteomîni adobai Codito nempo quëwëmîni imînipa. Wede pönëmîni adinque Wængonguï, Botö wëmîni imînipa, ante edonque acäimpa, ante odömoncæte ante tömengä ëmöwo ante mînitonga yewæmonte bai cædinque tömengä Tæiyæ Waëmö Önöwoca ingante da pönongä ænte ëwocamînipa. ¹⁴ Edæ Wængonguï, Botö quimîni inömîni inte mînitö abæ tawænte mîni goyedë mînitö ænguincoo mänñedë ate eyepæ pönî æncæminimpa, angampa. Äninque tömengä, Nö pönî impa, ante ëñencæminimpa, ante cædinque tömengä Önöwoca ingante nöwo da pönongä ænte ëwocamompa. Ininque pancacooga do ænte bai ëwocamö inte mönö, Inicayæ ate mönö tömancoo ænguinque impa, ante edonque ëñengäimpa. Tömengä mänömaï cæcä adinque mönö, Wængonguï bitö godömenque nãö apäite bai bitö ëmonguinque mänömaï cæbipa, ante watapæ apænecäimpa.

Nö ëñänäni bacædänimpa, ante Pabodo apænecampa

¹⁵ Botö inömö, Epeteoidi mönö Awënë Itota ingante wede pönänäni inänipa, ante tededäni ëñentabopa. Ayæ adobai, Wængonguï quinäni tömänäni inänite epeteoidi inömö waadete pönänäni inänipa, ante ëñënimo inte, ¹⁶ botö nîmpo cædämaï inte Wængonguï ingante cöwë

waa ate pönëninge apänebopa. Ayæ minitö beyæ ante cöwë apänebopa. ¹⁷ Itota Codito mönö Awënë iñongante Wængonguï iñömö adocä Codito Wængonguï inongä ingampa. Ayæ në Mæmpocä inongä inte tömengä ñäö ëmönongä ingampa. Tömengä ingante apänedinque botö, Bitö Önöwoca ingante da pönömi æninge epeteoidi iñömö në ëñëñäni bacädänimpa, ante apänebopa. Ayæ, Bitö Önöwoca pönö odömongä adinque epeteoidi wæætë Itota Codito ingante do ate bai ædæmö pönencädänimpa, ante botö minitö beyæ ante Wængonguï ingante cöwë apänebopa.

¹⁸ Wængonguï pönö cæcä beyænque watapæ bacäimpa, ante minitö pönente tocæminimpa, ante cædinque Wængonguï minitö iminite aa pegacäimpa. Ayæ adobai, Mönö tömengä quimö inte tæiyæ waëmö bayömonte tömengä nänö godömenque ñäö ëmonguinque mönö imonte ængacäimpa. Mänine mënea edæ näwangä inepa, ante minitö ëñencæminimpa, ante botö, Wængonguï bitö tömënäni mimönë tica ënente bai odömonte apänebi ate do ëñencädänimpa, ante Wængonguï ingante apänebopa. ¹⁹ Mönö në pönëmö iñömonte Wængonguï nänö pönö cæquino ante tömengä nänö tæi piñämämo æpodö i, ante mönö ædö cæte tee mante aquii. Incæte minitö, Mänimämo ante æpodö i, ante epeteoidi ëñencädänimpa, ante botö Wængonguï ingante apänebopa. Edæ, Tömengä nänö tæi piñämämo iñömö æbänö i, ante ëñencæte ante mönö, Tömengä gomonga tæi piñänongä inte iimaï cægacäimpa, ante ëñengäimpa.

²⁰ Në tæi piñänongä inte Wængonguï angä ate mönö Codito iñömö do wæningä inte edæ do ñäni ömæmon-gacäimpa. Ayæ godömenque tæi piñäninque Codito ingante öönæde ænte mäëdinque Wængonguï tömëmæ

inö angä Codito täe contagacäimpa. ²¹ Edæ æcämenque pedænguipoga iñonte miinguipoga iñonte ñænængä inte nē angä inaa, æcämenque nē awënë inaa, æcämenque täi piñante ongongä inaa, æcämenque ingante, Awënë ingampa, ante godö pemönäni mäniñäni tömänäni önönäni que incädänimpa. Mönö Codito adocanque ingante ogæ æñonte bai cædinque Wængongui angä ate tömengä wæetë Täiyä Awënë bacä acäimpa. ²² Ayæ Wængongui tömäo iñömö ongoncoo Codito önöwaca inö pönö wæentodöningue edæ, Bitö edæ Täiyä Awënë inömi inte edæ æmonga pöni ongoncæbiimpa, angacäimpa. Ayæ, Bitö imite godongämæ nē pönänäni tömännäni Ocamö bai iñömite, ²³ tömännäni wæetë bitö baö bai adoyonque bai incädänimpa. Codito ingante mänö-mainö ante apænedinque Wængongui, Bitö nē Awënë inömi inte tömäo iñömö ongoncoo tömancoo bitö nempo ongoncooque bacäimpa. Ayæ bitö imite nē pönänäni iñömö bacoo inäni yebänäni iinque bitö enempodö eyede pöni bacäimpa, ante Wængongui Codito ingante pönö cægacäimpa.

2

Wængongui nänö waadete pönönö beyænque quëwëmö

¹ Minitö guiquënë wëñëñedë ëñëñämaï cæte quëwëmini inte wënæ wënæ mini cädö beyæ dobæ edæ wæwocäimini ingaminimpa. ² Nē inguipogaque ante pönänäni taadö adodö cægonte bai minitö mäniñedë edæ wënæ wënæ cæte quëwengaminimpa. Ayæ wënæidi täi piñante näni owocabo awëmö iñömö näni cægönö adodö gote bai minitö tömännäni awënë miñæ tee empote godinque wënæ wënæ cægaminimpa. Ñöwo incæ Wængongui nänö änö ante nē ëñëñämaï cæte quëwännäni guiquënë adocä wënæ awënë nänö pönëwönö

ante eñente ewocadinque cædänipa. ³ Wëenëñedë tömëñäni tönö godongämæ quëwëninque mönö tömämö adobaï imæcaque ante pönëninque mönö towëmämoque ante quëwengamöimpa. Quiëmenque ante towencæte ante mönö cæinëwënö ante cædinque mönö ocaidë ædëmenque pönëninque mönö cæinëwënonque cæte quëwengamöimpa. Ìninque wadäni näni tente wæquënënö baï mönö adobaï imæcaque ante pönente në cämö inömö inte edæ Wængongui nänö piinte panguënëmämo ante edæ do tente wæquënëmö ingamöimpa.

⁴ Mänömaï ingaimö iñömonte Wængongui mönö imonte nanguï waadete pönëninque ïmaï nanguï waadedongä inte pönö waa cægacäimpa. ⁵ Mönö eñëñämaï cægainö beyæ ante wæwocate wæyömonte tömengä pönö cæcä beyænque mönö Codito tönö godongämæ quëwëmompä. Minitö edæ Wængongui nänö waadete pönö cægainö beyænque quëwëmini iminipa. ⁶ Wængongui angä Codito ñäni ömæmönongä mönö tömengä tönö godongämæ ñäni ömæmonte baï miimö badinque quëwengamöimpa. Ayæ mönö tömengä nempo quëwëmö iñömonte Wængongui iñömö Itota Codito ingante ææntodöninque mönö imonte öönädë ææntodonte Itota tönö pönö gönongä tæ contate baï ongömompä. ⁷ Mänömaï Itota Codito nempo quëwëñömonte Wængongui iñömö, Botö pönö waadete cædinque godömenque gomonga cæbo acædänimpa, ante cægacäimpa. Ayæ, Miinguipo badömo ate botö mäniñedë ate odömömo adinque tömänäni, Wængongui nänö waadete pönö cæganca wadäni dicæ adoganca cædäniyaa, ante wæcædänimpa, ante cæcæte ante mänömaï cægacäimpa.

⁸ Edæ Wængongui nänö waadete pönö cægainö

beyænque mīnitō mīni quēwenguinque wede pōnēmīni bamīnitapa. Incæte mīnitō dicæ nāmā mīni cæinō beyænque nē wede pōnēmīni bamīnitawogaa. Wæætē edæ Wængonguī pōnongā ænīnque mīnitō nē wede pōnēmīni bamīnitapa. ⁹ Īnīnque, Nāmanque cæte quēwēmo aedāni, ante mōnō edæ ānāmaī ingæīmpa. Īñæmpa wīī mōnō cædō beyæ quēwēmōmpa. ¹⁰ Edæ Wængonguī nānō nē badongāīmō īnōmō īmōmpa. Ayæ, Codito nempo nē quēwēnāni īīmaī cædinque waa cæcædānīmpa, ante tōmengā wēēnēñedē mōnō cæquēnēnō ante eyepæ badongacāīmpa. Īnīnque mōnō īmonte badōnīnque tōmengā, Codito Itota nempo quēwēnīnque mīnitō mīni waa cæquēnēnō ante edæ cæte quēwēncæmīnīmpa, ante pōnō badongā bagamōīmpa.

Codito beyænque ganca pōnēmōmpa, ante

¹¹ Mānōmaī beyæ mīnitō, Doyedē īīmaī ingatīmpa, ante pōnēedāni. Oodeoidi īñōmō ōnompoca æmontaique ēō togæīnāni inte nāmanque ante edæ, “Nē ēō togæīmōni īmōnīpa,” ante pemonte baī apænedānīpa. Wæætē mīnitō oodeomīni īnāmaī nē ēñagaīmīni īñōmīnite, “Bagāamīni īmīnīpææ,” ante mānīnāni pīiwēnāni wægāmīnīmpa. Īnīnque mīnitō mānīñedē æbānō ingaīmīni īnōmīnīi, ante yewæmōmo ate pōnēedāni. ¹² Mānīñedē edæ mōnō Codito nempo quēwēnāmaī ingaīmīni inte mīnitō mōni idægocabo nempo adobaī edæ quēwēnāmaī inte nānēnē quēwēngāmīnīmpa. Īnīnque Wængonguī, Īīmaī cōwē pōnō cæcæboīmpa, ante nānō angāīnō ante mōnitō godongāmæ Ao ante ēñente quēwēñōmōnīte mīnitō wæætē gobæ nānēnē quēwēnīnque Wængonguī nānō angāīnō ante edæ ænāmaī ingāmīnīmpa. Watapæ bacæīmpa, ante mōnitō pōnēnō ante mīnitō īñōmō nānēnē quēwēnte ædō cæte

watapæ pönente toquimīnii. Gobæ quëwëninque mīnitō Wængonguī nempo edæ quëwënāmaī ingaminimpa. ¹³ Incæte mīnitō gobæ nē quëwënōmīni iñōmīnite Itota Codito nāmā wepæ godonte æninque mīnitō imīnite ænte māmōngā eyequeī pōni pōninque mīnitō ñōwo tōmengā nempo quëwëmīnīpa.

¹⁴ Wëēnēñedē mōnitō tōnō mīnitō guëadō guëa cædōmō ingaimō inte mōnō, Nānēnē incæmīnīpa, ante wææ cæ impa tæcæguedē wææ gōnonte bai cægāmōimpa. Codito iñōmō nē piyænē cædongā inte, Wææ cæ impa, mōnō ānōmpa bæ tate wido cæte bai cædinque mōnō imonte äāñōmonque badōngā bamōimpa. İninque tōmengā mimōnē nē piyænē cæte entawënongā ingā beyænque mōnō adobai gānē pōnēmōmpa. ¹⁵ Edæ Wængonguī, İmaī cædāni, ante wade wade ante nānō wææ angainō ante ëñëninque dodāni godōmenque wææ angadānīpa. Mōnō Codito iñōmō inguipoga pōninque mānīne ante tōmānō ante ëñente cæte quëwengacāimpa. Ayæ, Idæwaa wææ ante impa, ante bai cædinque tōmengā mānīne ante nāmā baonga mongænte wænīnque tee moncate bai cægacāimpa.

Mānōmaī cædinque tōmengā, Mīnitō mencaboga inte nānēnē quëwëmīni incæte ñōwo piyænē cæte botō nempo godōngāmæ quëwencæmīnīpa, ante cædinque mōnō imonte ænte wempo cægacāimpa. İninque mōnō edæ piyænē cæte quëwenguīnque edæ äāñōmonque bagāmōimpa. ¹⁶ Itota Codito ingante awāa timpodāni wængā iñinque tōmengā mōnō guëadō guëa piinte cægaimāmo ante ænte mongænte wido cæte bai wængā beyænque mōnō piyænē cæmō bagāmōimpa. Ayæ ado tōmengā awāa nānō wængainō beyænque mōnō tōmāmō adocabomō bamō adinque Wængonguī wæætē

piyænē cædinque mōnō imonte Ao āninqe ængacāimpa.
¹⁷ Minitō guiquēnē gobæ nānēnē quēwēñōmīnite mōnitō
 guiquēnē Wængonguī weca eyequeī quēwēñōmōnite
 Codito iñōmō inguipoga pōninqe mōnō tōmāmō imonte
 apænedinqe, Piyænē cæte gānē pōnente quēwēedāni,
 ante pōnō apæneca ēñentamompa. ¹⁸ Tōmengā nānō
 pōnō cægāinō beyænque mōni oodeocabo adobaī mīnitō
 wamīni adobaī mōnō tōmāmō Wængonguī Ōnōwoca ad-
 owocaque ingante ēwocamō inte mōnō Wæmpocā weca
 tōmāmō do pōmompa.

¹⁹ Īninqe mōnitō Wængonguī quīmōni do bagaimōni
 inte Wængonguī nempo quēwēmōni ingaimōni baī
 Codito nānō pōnō cægāinō beyænque mīnitō adobaī
 mōnitō tōnō adocabomīni do badinqe edæ Wængonguī
 nempo quēwēmīni imīnīpa. Īninqe mīnitō ñōwo
 idæwaa wamīni ingamīnīpa. Wīī wabæca quēwente
 baī edæ tōmēmīni oncōnē ponte owote baī mīnitō ñōwo
 Wængonguī nempo quēwēmīnīpa. ²⁰ Waodāni dica
 tāno gōnōninqe tānōcaa wænōmēnæca mænōnāni baī
 Wængonguī adobaī cædinque Itota Codito ingante tāno
 gōnongā ongōñongante tōmengāa godō mænonte baī
 cædinque mōnō imonte iīmaī cædinque pōnō gōnongā
 gongæmompā. Codito nānō nē da godongaimōni
 tōnō tōmengā beyæ nē apænemōni tōnō iñōmōnite
 Wængonguī mōnitō imōnite æninqe wænōmēnæca
 gōnongā gongæñōmōnite wadāni inānite gā æænō
 tæī mænonte baī gōnongā gongænānīpa. ²¹ Codito
 nempo quēwēñōmōnite Wængonguī mōnitō imōnite
 adocooga gō cæte baī pōnō tæī mænongā ate mōnitō
 æicō baī bacō baī bamōnīpa. Edæ Wængonguī Tæiyæ
 Waēmō Ōnōwoca ingante āanque baī ēwocadinque
 mōnitō godongāmæ Awēnē tæiyæ waēmō oncō baī
 bamōnīpa. ²² Bayōmōnite mīnitō adobaī tōmengā

nempo ongöñöminite Wængongui mīnitō imīnite ænīnque mōnitō tōnō godongāmæ māmō adocooga gö cæte tæi mænonte bai cædinque, Mīnitō botō Önōwoca tōnō äawocaque bai ewocadinque botō owoquincō bai bamīnīpa, ante pōnō badongacāimpa.

3

Oodeoidi ināmaī ināni inānite apænecæ gotabopa, ante

¹ Mānīnō beyæ iīmaī ante apænebopa. Botō Pabodobo iñōmō Codito beyæ ante oodeomīni ināmaī imīni imīnite apænecæte ante cæyōmote botō imote edæ tee mōnedāni wædōmo inte yewæmōmopa.

² Mīnitō oodeomīni ināmaī imīni iñōmō iīmaī ante wabānō eñēmīnitawo. Wængongui pōnō angā eñēnīnque botō mīnitō beyæ tōmengā nānō waadete cædōnō ante nē apænequēnēmo batabopa. ³ Mānīnō ante botō, Wængongui awēmō nānō cægāinō ante botō imote edonque odōmongā atabopa, ante do wædænque yewæmōmo amīnitawo. Edæ adodō ante ñōwo yewæmōmopa.

⁴ Inīnque mānōmaīnō ante botō do yewæmōnīnta adīnque mīnitō, Mōnō Codito awēmō nānō cægāinō ante Pabodo do ate bai eñengampa, ante eñēmaīmīnīpa.

⁵ Mōnitō wæmæidi nāni quēwēñedē nē quēwengāināni iñōmō, Mōnō Codito iīncayæ ate pōnīnque æbānō awēmō cæquingāā, ante eñēnāmaī inte wægadānīmpa. Ñōwo guīquēnē Codito beyæ nē apænedāni tōnō mōnitō tōmengā nānō nē da godōnīmōni tæiyæ wæmō bamōni iñōmōnīte Wængongui Önōwoca mānīnō ante edonque odōmonte apænecā eñēmōnīpa.

⁶ Iīmaī ante impa. Mōnitō Wængongui nānō pōnonguīncoo nē ænguīmōni iñōmōnīte mīnitō oodeoidi ināmaī imīni inte mōnitō tōnō adocabomīni badīnque edæ mōnitō tōnō godongāmæ nē ænguīmīni adobai

baminipa. Ayæ, Itota Codito tönö pönö cædinqwe Wængongui nänö, Cöwë cæcæboimpa, ante angainö do cægacaimpa, ante watapæ pönëninque minitö mönitö tönö edæ godongämæ quëwencæminimpa.

⁷ Wængongui në täi piñænongä inte waadete pönö nangui cæcä adinqwe edæ tömengä beyæ në cæbo badinqwe botö Codito ingantedö ante në watapæ apænebo batabopa. ⁸ Mönö tömämö Wængongui quimö iñömonte botö iñömö wamini bai wii imopa. Botö adoboque wädämo pöni imo incæte Wængongui waadete cædinqwe pönö angä ëñëmo inte botö minitö iminite në apænebo batabopa. Codito nänö pönö cægainö ante æpodö i, ante mönö ædö cæte tee mante ëñenguüi. Incæte Wængongui waadete pönö cæcä beyænque botö iñömö Codito waa pöni nänö pönö cægainö ante edæ oodeo inämaï imini iminite në apænequënëmo batabopa. ⁹ Ayæ Wængongui tömancoo në badongaingä inte wëenëñedë nämanque entawëninque awëmö nänö wë wodongäinö ante botö imote odömonte apænecantapa. Ayæ, Pabodo mäninö ante edonque odömonte apænequënegä ingampa, ante tömänäni ëñencædänimpa, ante pönö apænecä æntabopa.

¹⁰ Codito ingante mönö godongämæ pönencabo iñömonte tömengä wadö wadö ante tömänö ante në ëñengaingä inte mönö tönö godongämæ cæcampa. Mönö tönö mänömaï cædinqwe tömengä, Botö wadö wadö ante tömänö ante botö ëñengainö ante adinqwe öönædë quëwënäni awënëidi tönö mänïñömö në änäni tönö wæcædänimpa, ante cægacäimpa. ¹¹ Wëenëñedë pedämämo iñönte Wængongui, Cæbo ate awënëidi incæ wæcædänimpa, ante cöwë pönengacäimpa. Nöwo iñömö tömengä mäninö ante nänö pönengainö ante tömengä mönö Awënë Itota Codito tönö godongämæ cædinqwe

do cægacäimpa. ¹² Codito nempo në quëwëmö inte mönö tömengä ingante wede mönö pönënö beyänque guiññämaï inte Wængongui weca do pöninque apäñemompa. ¹³ Mänömaï impa, ante edæ mīnitö do ëñëminipa. Ìninqe botö mīnitö beyä ante cædinque botö caate wädö ante pönëninque mīnitö wæätë wädämaï iedäni. Wæätë, Mönitö godömenque ñäö bai ëmoncämönimpa, ante Pabodo caate wæcampa, ante pönëninque mīnitö wädämaï incämīnimpä ämopa.

Codito nänö pönënö ante

¹⁴ Mäninö beyä mönö Awënë Itota Codito Wæmpocä iñongante botö tömengä önöwaca inö da guicapodinque apäñebopa. ¹⁵ Tömengä iñömö edæ adocanque näwä Wæmpocä ingampa. Ìninqe inguiyoga quëwëmö incæ öönädë quëwënäni incæ tömengä ingante, Mæmpo, ante në tedemö iñömö mönö tömengä tönö mönö wæmpocabo bai imompa.

¹⁶ Ìninqe mönö Wæmpocä ingante apäñedinque botö mīnitö beyä ante iïmaï ante apäñebopa. Wængongui bitö në ñäö bai entawëmi inömi inte bitö Tæiyä Waëmö Önöwoca ingante epeteoidi inänite da pönömi äñinque tömënäni wæätë edæ mīmö tæï pīñänte entawencädänimpa, ante apäñebopa. ¹⁷ Ayä, Mönö Codito adobaï mīnitö weca pöñongante mīnitö mīmönë wede pönëninque tömengä ingante ædæmö entawencämīnimpä, ante mönö Wæmpocä ingante apäñebopa. Ayä, Awä ædæmö guiwa inte tömëmä äwäate pæwä bai cædinque mīnitö iñömö adobaï tömengä nänö waadete pönëmämo entawëninque edæ mīmönë tæï ongömīni bacämīnimpä. ¹⁸ Ayä mönitö Wængongui quimöni tönö mīnitö adocabomīni inte tæï pīñämīni badinque, Itota Codito nänö waadete pönënö ante ægancadö owoo, ante

ēñencædānimpa, āmopa. Ayæ, Tömengä nänö waadete pönēnō iñōmō edæ yepanca pōnī owopa, oopānō pōnī owopa, æibæ pōnī owopa, wincamō pōnī owopa, ante ēñencædānimpa, ante apænebopa. ¹⁹ Ayæ edæ, Mönö Codito waadete nänö pönēnō æbānō gomonga pōnī owoo, ante mōnō ædō cæte ēñenguī, ante mōnō wædō incæte mīnitō mānīnō ante ēñencæmīnimpa. Ayæ edæ, Mānīnō ante ēñēmīni inte mīnitō Wængonguī nänö nanguī entawēnō edæ eyepæ pōnī entawencæmīnimpa, ante botō mōnō Wæmpocā ingante apænebopa.

²⁰ Mönö änō ante ayæ mōnō pönēnō ante eyepæ cædongä inte Wængonguī iñōmō mōnō imonte tæi piñænte nänö cæpāmo ganca cædinque nanguī gomonga cæcā ingampa. Īnīnque ñōwo iñōmō mōnō Wængonguī ingante waa ate pōnente apænecæimpa. ²¹ Edæ do wænte æigaināni tōnō ayæ ate ēñate quēwenguīnāni tōnō mōnō tōmāmō Codito ingante godongāmæ mōnō pōnencabo iñōmō inte Itota Codito ingante ēwocadinque mōnō godongāmæ apænecæimpa. Mæmpo Wængonguī ēñēmi. Bitō adobique ñāō ēmongāimi iñōmi imipa, ante mōnō ñimpo cædāmaī inte cōwē waa ate apænecæimpa. Mānōmaī impa, ante botō, Amēē, āmopa.

4

Codito nempo quēwēnīnque adocabomō imompa

¹ Waa cæte quēwencæmīnimpa, ante Wængonguī aa pecantapa, ante ēñēmīni inte mīnitō tōmengä nänö ānonque ante ēñente cædinque quēwencæmīnimpa. Botō mōnō Awēnē beyæ tee mōnete wæcōmo incæ āmo ēñēedāni. ² Mīnitō nāmā ængō cædāmaī inte, Ōnōmoque bai imopa, ante pōnēnīnque wadāni iñānite edæ ædæmō cæedāni. Æiquedō waa cæquinānīi, ante wædāmaī inte edæ piyænē cæte quēwēedāni. Ayæ wadāni mīnitō

iminite wænæ wænæ cædāni wædinque tōmēnāni inānite wæætē piināmaī inte ædæmō waadete cædāni. ³ Minitō, Mōnō pōnencabo piyænē cædinque cōwē adodō ante pōnente edæ Wængongui Ōnōwoca tōnō āanque baī ee ēwocacæimpa, ante nanguī cædinque wacā ingā wacā ingā edæ waa cædāni.

⁴ Mōnō Awēnē pōnō cæcā ate watapæ bacæimpa, ante mīnitō adodeque ante pōnente tocæminimpa, ante Wængongui mīnitō iminite edæ adodeque ante aa pegacæimpa. Īnīnque mānīne, Watapæ bacæimpa, ante mīni pōnēne adodeque ī baī Wængongui Ōnōwoca edæ adobaī adowocaque inte quēwengampa. Tōmengā adowocaque nempo quēwēnōmō inte mōnō adobaī edæ adocabomonque inōmō imompa. ⁵ Mōnō Awēnē edæ adocanque pōnī inongā iñongante tōmengā ingante mōnō wede pōnēnō adobaī adodeque pōnī inepa. Ayæ adodō ante pōnēnīnque æpænē guīdinque mōnō adopænenque guīte baī guītamompa. ⁶ Wængongui adocanque pōnī inongā inte tōmengā tōmāmō Wæmpocā adocanque ingampa. Tōmengā iñōmō edæ Tæiyæ Awēnē pōnī inongā inte tōmāmō imonte nē aacā ingampa. Tōmengā adocanque pōnī nempo quēwēñōmonte tōmengā wæætē mōnō tōmāmō mīmōnē quēwengampa.

⁷ Incæte mōnō Codito, Mīmōnē bitō entawenganca ænte cæe, ante tee mante baī cædinque adocanque ingante waadete pōnō cædinque wacā ingante waadete pōnō cædinque edæ tōmāmō imonte tōmengā nānō pōnō cæcoo eyepæ pōnongā ænīnque entawēmompa. ⁸ Codito mānōmaī cæcæcæimpa, ante pōnēnīnque awēnē Dabii wodi iīmaī ante yewæmongacæimpa.

“Tōmengā æibæ æicæ cædinque wadāni inānite bæi on-gonte ñā cæyænte tōmengā mīñæ ænte mæicā æigadānimpa.

Ayæ æidnque tōmengä mönō waocabo iñōmonte, Minitō entawenguinō, ante eyepæ pædæ pōnongä ænte entawengamōimpa,”

ante Dabii nänō yewæmonte angainō bai impa.

⁹ Mäniine, “Æigacäimpa,” ante nāni angaine iñōmō quinante yewæmongatīi. Edæ, Tōmengä inguipoga tadō-mengadæ do wææningä inte æigacäimpa, ante odōmon-cæte ante yewæmongatimpa. ¹⁰ Nē wæængaingä inongä iñōmō adocä do öönädē gōmonga æidnque inguipoga tōmäo öönädē tōmäo tōmäo iñōmō edæ godōmenque æibæ pōni quēwengä inongä ingampa. ¹¹ Tōmengä tōmancoo nē ènempocä inongä inte adocä mönō waomō imonte pōnō angä ænte entawēninqe mönō iūmaī cæmō bamōimpa. Pancamōniya imōnite tōmengä angä èñēn-inque tōmengä nänō nē da godongaimōni batamōnipa. Pancamōniya guiquēnē Wængongui waa pōni nänō pōnō cægainō ante nē apænemōni batamōnipa. Pancamōniya guiquēnē Wængongui beyæ nē apænemōni batamōnipa. Pancadāniya guiquēnē nē aadāni badānitapa. Ayæ pancadāniya guiquēnē nē odōmonte apænedāni badānitapa. ¹² Mänōmaī pōnō cædinque mönō Codito mönō ocamō bai inongä inte, Botō baō bai adoyonque bai ināni iñōmō ñancæ äate bai tæi piñænāni èwocacædānimpa, ante pōnō cægacäimpa. Mönō imonte tōmengä, Minitō Wængongui quimīni inōmīni inte tōmānāni inānite nē cæmīni inte godō cæcæmīnimpa, ante pōnō cægacäimpa.

¹³ Mini wede pōnēnō ante mīnitō tōmāmīni adoyōmō ante pōnencæmīnimpa, ante mönō Codito pōnō cægacäimpa. Ayæ, Botō Wængongui Wēmo iñōmote mīnitō botō imote ate bai pōnencæmīnimpa, ante tōmengä pōnō cæcampa. Ayæ æmæwo pæmīni bai mīni baquinque mīnitō botō entawēnō ædæmō entawencæmīnimpa, ante Codito edæ da pōnongä eyepæ æmompā. ¹⁴ Ininque æmæwo pædimō inte wēñæmō ināmaī imō ininque mönō

edæ oda cædāmaī ingæimpa. Wadāni guiquënë mā pönëninque, Æbānō cæmō ate oda cæquinānii, ante edæ nāmāneque tedewēnānipa. Tömēnāni iñmō edæ babæ cæcæte ante cædinque waa cæte baī cædāni ataqe-edāni. Woboyæ ædæ go ædæ go pæmænte baī cædinque tömēnāni wadō ante odōmonte tedewēnānipa. Mänōmaī wido piñænte baī cædāni incæte mönō iñmō Codito nānō entawēnoncoo ænte entawēninque ää mænāmaī ingæimpa.

¹⁵ Wæætē Wængonguī, Nāwangā pönī impa, ante nānō apænegainō ante mönō tömānāni inānite waadete pönēninque apænecæimpa. Mänōmaī cædinque mönō Codito baō baī iñmōmonte tömengā nē Ocamō baī inte pönō angā beyænque mönō ñancæ äadinque godōmenque picæmō bamompa. ¹⁶ Mönō baonga wepæ eyepæ eñadinque ñancæ äadinque tæi piñænte pæte quēwēmompa. Adobaī mönō Codito baō tönō adoyonque baī inmō inte mönō tömengā nānō apænedō ante eñēnōmo inte ñancæ äate pæte baī quēwēmompa. Ayæ wæætē ocai encamō inte mönō pæ pagænguinque wangō tēnāmaī ougincāi bamē impa. Ayæ adobaī mönō Codito nānō waadete pönēnō ante mīmōnē entawēmō inte mönō wacā ingā wacā ingā godō aamō inte mönō pönencabo incæ edæ tæi piñænte entawēmompa.

Codito nempo mönō iūmaī quēwēmompa, ante

¹⁷ Ìninque mönō Awënë nempo quēwēnōmo inte botō nō āmo eñeedāni. Wadāni nē eñēnāmaī ināni önonquedō ante pönëninque quēwēnānipa. Minitō guiquënë adobaī quēwengaimini inte ñōwo wæætē ñimpo cædinque mänōmaī cædāmaī inguënë quēwēmīnii. ¹⁸ Tömēnāni guiquënë mīmō eñēnānipa diyæ Wængonguī weca ponguīnānii. Mīmō ömædēnāni inte tömēnāni ocai eñēnāmaī badāni beyænque Wængonguī weca pönāmaī

inänipa. Edæ wentamö mongæninque tömënäni ocai wëmö encadäni inte idiquibæ ante pönënanipa. ¹⁹ Ìnäni ìñömö tömënäni nänäi cæquënënö ante ñimpo cædinque ñöwo wæætë guiñënämaï inte baö nänäi towëinënö ante cæcæte ante nämä pædæ godonte bai edæ cædänipa. Edæ, Quiëmë wiwa cæquiï, ante mäninonque cæcæte ante godömenque cæinente wædänipa.

²⁰ Wæætë minitö guiquënë, Mönö Codito æbänö ingää, ante pönëninque edæ wii tömënäni nänäi cæinëwënö bai mini cæquinque edæ pönëmïnitapa. ²¹ Tömengä apænecä edæ wii ëñëmïnitawo. Ìñæmpa, Wængongui nö pönï nänö apænegainö ëñëninque Itota ìñömö mimönë entawengampa, ante minitö tömengä nempo quëwëñömïnite tömengä mänömainö ante adodö ante edæ do odömonte apænecä ëñëmïnitapa. ²² Minitö wëenëñedë mini cæte quëwengainö ante tömengä iïmaï ante odömonte apænegacäïmpa. Babæ pönente mini cæinente wæwënö beyæ minitö mimönë wentamö mongænte wæwëmïni inte do mini entawengainö ante edæ wido cædäni, ante odömonte apænegacäïmpa. ²³ Edæ mempoga ëñagaimini inte minitö ëñënö do mii pönï encamini inte miïnonque ante pönencæminimpa, ante odömonte apænecä ëñëmïnitapa. ²⁴ Ayæ, Botö pönö badömo ate minitö botö bai tæiyæ waëmö ëwocadinque nö pönï cæte quëwencæminimpa, ante Wængongui pönö badongä ate minitö mïmïni baгамinimpa. Ìninque tömengä, Mäninö Wængongui nö pönï nänö entawënö æninque minitö ædæmö entawencæminimpa, ante odömonte apænecä do ëñëmïnitapa.

²⁵ Mänömaï beyæ minitö tömämïni, Mönö adocabomö imompa, ante adinque babæ mini tedewëinönö ante ñimpo cædinque wacä ingante wacä ingante näwangä ante apæneedäni.

²⁶ Ænguī bamīni incæte mīnitō piyǣnē cædinque wacā ingante wēnæ wēnæ cædāmaī ee aedāni. Edæ gāwadecæ ganca nanguī pīinque edæ mīni wæquinque īmāimpa.

²⁷ Mānōmaī cædinque mīnitō, Wēnæ incæ pōnō cæcā ate botō ænguī batabopa, ante pōnente wædinque ñōwo wæætē, Wēnæ botō weca pōnāmaī incæcāimpa, ante nāmā wææ cæedāni.

²⁸ Nē awēmō æningā īñōmō ñōwo edæ ee cædinque awēmō ænāmaī incæcāimpa. Wæætē, Botō ōnompoca nanguī cædinque ænte quēwēninque nē ænguēnēnāni īnānite adobaī godōmo æncædānimpa, ante cæcæcāimpa.

²⁹ Mīnitō nāmā ōnōne wææ aadinque wīwa ante tededāmaī īedāni. Wæætē edæ, Wadāni æbānō ante ēñenguēnēnāni īnāniī, ante pōnēninque mīnitō, Tōmēnāni tǣi pīñante entawencædānimpa, ante cædinque nē ēñēnāni beyænque ante waadete godō cædinque apæneedāni.

³⁰ Wængonguī Tǣiyǣ Waēmō Ōnōwoca īñōmō mīnitonga pō guīdinque, Botō æmo beyænque mīnitō iīncayǣ ate æmǣwo abæ tawænte gote baī quēwencæmīnimpa, ante odōmoncæte ante yewæmonte baī cægacāimpa. Īninque mīnitō, Wēnæ wēnæ mōni cædō beyǣ ante Wængonguī Ōnōwoca wæwente badāmaī incæcāimpa, ante wææ cædinque edæ ēñente cæedāni.

³¹ Ayǣ, Wīi waēmō awædō, ante mīni pīwēnīnō ante edæ ñimpo cæedāni. Āimō ante mīni pōnēwēmāmo adobaī ñimpo cædinque ænguī pōni mīni badīmāmo edæ ñimpo cæedāni. Yæ ante mīni pīinte ogǣ tedewēmāmo, wacā ingante ante mīni pīinte tedewēmāmo edæ ñimpo cæedāni. Ayǣ pīinte cæquinque ante mīni entawēnīnō ante tōmānō edæ wido cæedāni. ³² Wæætē godongāmǣ waadete cædinque wacā caate wæcā adinque mīnitō godongāmǣ Ca ca wæcæmīnimpa. Ayǣ Codito ængā beyænque Wængonguī mīnitō īmīnite pōnō ñimpo cæ-

campa cæminii. Tömengä ñimpo cæcä quëwëmini bai munitö adobaï cædinque wadäni wënæ wënæ cæyönänite wacä ingä wacä ingä ñimpo cæmini quëwënänii.

5

Wængonguï wëmini, iïmaï cæte quëwëedäni, ante

¹ Ìnque Wængonguï wëmini iïmömö munitö tömengä nänö në waademini inömini inte Wæmpocä nänö cæi bai ante cöwä adinque adobaï cæedäni. ² Baö, Wængonguï quï, ante godöningue, Oguï wacæïmpa, ante iya tänäni bai cædinque Codito mönö imonte waadete pönëningue edæ adobaï cægacäïmpa. Tömengä iïmömö, Botö Wængonguï quïmo imopa, ante nämä wepæ pædæ godöningue mönö imonte wæätë ængacäïmpa. Ìnque tömengä nänö waadete pönënö bai munitö adobaï waadete pönëningue quëwëedäni.

³ Wæätë edæ mini pönencabo iïmönite waocä adocanque incæ nänöogængä inämaï iïngante godö guëa mönämaï iedäni. Wentamö mongæ wæcæ wæ, ante edæ wiwa cædämaï iedäni. Nanguï mäincoo ante æinente wædämaï iedäni. Mäninö tömänö cædämaï imini inte mäninö ante edæ adopoque incæ tededämaï imæwedäni. Edæ Wængonguï quimini tæiyæ waëmö entawëmini inte munitö mäninö tömänö cædämaï incæminimpa. ⁴ Wentamö ante nani pönëwënö bai munitö wæätë adobainö ante pönënämaï iedäni. Önonque ante nani tedewënö bai munitö wæätë adobaï tededämaï iedäni. Wënæ wënæ ante pönente nani badete towënö bai munitö wæätë adobaï badete todämaï iedäni. Ìnæmpa Wængonguï quimini inömini inte munitö mäninö ante wii pönenguënëmini iminipa. Wæätë Wængonguï ingante waa ate pönëningue apænequënëmini iminipa.

⁵ Awënë Odeye Wængonguï nempo ayæ Awënë Odeye Codito nempo edæ ædänidö në guiite ænguïnäni inänii.

Nänöogængä inämaï iñongante në towënäni tönö wentamö pönente në cædäni iñömö tömënäni edæ dicæ guite ænguïnäniyaa. Ayæ mäincoo ante wacä qui në æinente wæwënäni iñömö edæ, Mäincoo incæ mönitö wængongui impa, ante bai cædäni inönäni inte tömënäni adobaï edæ guite ænämaï incædänimpa. Ante ämo ëñëedäni. ⁶ Wadäni, Minitö oda cæcæminimpa, ante önonquedö ante tedete cæyönänite minitö wæætë tömënäni näni tededö ante edæ ëñënämaï iedäni. Edæ tömënäni ëñënämaï inte näni wënæ wënæ cædö beyæ Wængongui ængui badinque tömënäni inänite pancæcäimpa. ⁷ Ininque minitö gooque gomö adinque tömënäni tönö godongämæ cædämaï iedäni.

⁸ Minitö iñömö wëenëñedë wentamö mongämïni ingaimïni inte ñöwo wæætë edæ mönö Awënë nempo quëwëninque edæ ñäö bai entawëmïnipa. Ininque Mæmpo nänö ñäö ëmönö bai entawëmïni inte minitö ñäö iñömö cægonte bai edæ waa quëwëedäni. ⁹ Edæ waiwæ waincate bai cædinque mönö wadäni inänite godö waa cæquinque mönö edæ ñäö iñömö quëwëmompa. Ayæ nö pönï mönö cæquinque näwangä pönï ante mönö apænequinque edæ ñäö iñömö quëwëmompa. ¹⁰ Ayæ, Æbänö cæmö ate mönö Awënë, Waa cæmïni abopa, ante apænequingä, ante ëñencæte ante cædinque do ëñëñïmi inte tömengä nänö waa adonque cædäni. ¹¹ Wadäni wëmo iñömö önonque näni cædö ante adinque minitö iñömö edæ gooque gomö aedäni. Ayæ tica ënente bai cædinque, Tömënäni näni cædö wënæ wënæ impa, ante edonque odömömïni acædänimpa. ¹² Awëmö näni cædö beyæ guingo imonte wæquënänäni iñönäni mönö iñömö edæ guïñënete wædinque mäninö ante edæ tededämaï ingäimpa. ¹³ Wæætë edæ, Awëmö iñömö æbänö cædänii, ante tömänö ante edæ tica ënente edonque acäimpa.

¹⁴ Ñäö beyænque edæ edonque amompa. Mänömaï i beyä iïmaï ante ämotamini ante bai apænedänipa.

“Bitö wangäë möïmi inte ñäni ömæmonte ængäë gantie.

Edæ ængäë gantiyömite

Codito incæ pönö tica ënente bai cæcä ate ñäö entawencæbiimpa,” ante apænedänipa.

¹⁵ Mänömaï beyäë mïnitö ocäi ömæcamini inämaï inömini inte wæätë ocäi në encamini inte cædinque, Æbänö waa cæte quëwenguïmo, ante nämä waa ate waa cædäni. ¹⁶ Wädäni ñöwo incæ godömenque wiwa cædänipa cæminii. Eyepäë iñonte mïni cæquënënonque ante edæ do cædäni. ¹⁷ Edæ wëñænäni owempote cædäni bai mïnitö adobai cædämaï iedäni. Wæätë, Wængonguï æbänö angantawo, ante ëñëninque mäninonque ante ëñente cædäni. ¹⁸ Waodäni biïnömäë näni ämæ bedinque dowænte badinque godömenque pönënamäi cædinque tömënanäni näni ëwente wæwenguinque bewënanäni. Ininque mïnitö iñömo bete dowænte badämaï iedäni. Wæätë Wængonguï Önöwoca ingante ædæmö ëwocate quëwëedäni. ¹⁹ Ämotamini ante bai godongämäë watapæ ante tedeedäni. Awënë Dabii wodi nänö ämotamini angaintaa adinque edæ adodö äedäni. Ayäë mïnitö nämä mä pönëninque, iïmaï Wængonguï beyäë mönö ämotamini angäimpa, ante adodö äedäni. Wængonguï Önöwoca angä ëñente ëwocadinque tömengä ämotamini nänö änönö ante adodö äedäni. Mïmöno ämotamini ante bai pönëninque mïnitö mönö Awënë ingante watapæ pönente äedäni. ²⁰ Æbämë bayonte mïnitö tömänö beyäë ante edæ Mæmpo Wængonguï ingante cöwë waa ate pönëninque mönö Awënë Codito ëmöwo ante apæneedäni.

Mæmpoidi näni wencabo iïmaï quëwencædänimpa

²¹ Mönö Codito ingante guiñente wædinque mīnitō wīi nāmā mīni pōnēnonque bai cædinque wæætē edæ, Nē ānāni æbānō ānānii, ante Ao ate nōinō ante cædāni.

²² Onquiyæmīni ēñēedāni. Mīnitō, Mönö Awēnē nānō angaiñō bai mönö ēñente cæcæimpa, ante tōmēmīni nānōogænāni inānite Ao ante ēñente cædāni. ²³ Edæ Codito ingante mönö godongāmæ pōnencabo iñōmonte mönö Codito adocā iñōmō, Quēwencæmīnimpa, ante nē Ængaingā inongā ingampa. Tōmengā tönō mönö adoyonque bai iñōmonte tōmengā iñōmō mönö Ocamō bai inongā ingampa. Ayæ onquiyængā tönō onguiñængā adobai adoyonque bai iñōnate onguiñængā iñōmō nē ocamō bai inongā ingampa. ²⁴ Iñinque Codito ingante mönö godongāmæ pōnencabo incæ tōmengā ingante Ao ante ēñente cæmō bai onquiyænāni adobai tōmēnāni nānōogænāni inānite cōwē edæ Ao ante ēñente cæquēnēnāni inānipa.

²⁵ Wæætē onguiñæmīni ēñēedāni. Mīnitō Codito nānō waadete pōnēnō bai tōmēmīni nānōogænāni inānite adobai waadete pōnēedāni. Tōmengā ingante mönö godongāmæ pōnencabo iñōmonte tōmengā iñōmō mönö imonte waadete pōnēnīnque mönö imonte æncæte ante pōnō cædinque nāmā wepæ godongacäimpa. ²⁶ Ayæ, Wængongui nānō apænedō waēmōmæ imæ bai iñonte mīnitō iñōmō māninō ante ēñēnīnque tæiyæ waēmō ewocate quēwencæmīnimpa, ante mönö Codito adocā mönö imonte edæ ñā mēnongate bai cægacäimpa. ²⁷ Mānōmaī tæiyæ waēmō badīnque mönö wentamō mongænāmaī inte Codito ingante mönö pōnencabo adocabomō iñōmonte tōmengā iñōmō edæ nānōogængā ænte bai cædinque mönö pōnencabo imonte, Bitō, ante apænegacäimpa. Ayæ mönö cabo iñōmonte tōmengā, Bitō idiquibæ entawēnāmaī iñōmite ædō cæte bitō imite

püinte angüü, ante pönö cægacäimpa. Ayæ wæætë edæ, Ñä mënongate bai tæiyæ waëmö ëmömi ininque mönö edæ guëa ñäö apäite bai ëmongäimpa, ante Codito nänöogængä ænte bai mönö imonte pönö ængacäimpa.

²⁸ Ongüñænäni iñömö adobai tömënäni, Botö baö, ante näni pönë bai tömënäni nänöogænäni inänite adobai waadete edæ pönenguënänäni inänipa. Æcänö tömengä nänöogængä ingante waadete pönëna iñömö tömengä nämä baö ante waadete pönente bai edæ cæcampa. ²⁹ Iñæmpa waocä nämä baö cöwë püinämaï ingampa. Wæætë, Botö baö, ante edæ pæ gompodinque pönö aacampa. Ayæ adobai Codito ingante mönö godongämæ pönencabo iñömönte edæ tömengä adobai, Botö baö, ante bai cædinque mönö imonte wææ gompodinque pönö aacampa. ³⁰ Edæ mönö Codito në Ocamö bai inongä inte në angä iñongante mönö wæætë tömengä tönö adoyonque bai inte ëñente quëwëmompä. ³¹ “Mänömaï beyæ onguïñængä mæmpo tönö badä inate ëmö cæte godinque onquiyængä ingante, Botö nänöogængä, ante æmæwo monte quëwencæcäimpa. Mënaa inina incæ tömëna wæætë nana gæncaya badinque adocanque bai bacædäimpa,” ante yewæmongatimpa.

³² Mänömainö ante näni yewæmongainö ante edæ wë wodonte bai i iñönte wii tömänö ante ëñëmompä. Incæte, Codito ingante mönö godongämæ pönencabo iñömönte mönö tömengä tönö adocanque bai imöimpa, ante minitö ëñencæminimpa, ante botö apænetabopa. ³³ Incæte onguïñæmi nämä bitö waadete pönënonganca tömëmi nänöogængä ingante edæ adoganca waadete pönencæbiimpa. Onquiyæmi adobai, Botö nänöogængä ingampa, ante adinque edæ ëñente cæcæbiimpa.

6

¹ Wēñæmīni guiquēnē ēñēedāni. Mīnitō mōnō Awēnē nempo quēwēnōmīni inte tōmēmīni mæmpoidi inānite edæ ædæmō ēñente cæedāni. Æcānō edæ mǎnōmaī cædaa tōmengā edæ nō pōnī cæcampa. ²“Wæmpocā ingante wǎānā inante waa adinque tōmēna inate godō waadete cæe,” ante Wængongui incæ wææ angacāimpa. Tōmengā wade nānō wææ angainō āninque, Mīni waa quēwenguinque cæcæmīnimpa, ante apænedāmaī ingaingā inte ñōwo iīne ante wææ āninque, Mīni waa quēwenguinque cæcæmīnimpa, ante mā apænegacāimpa. ³ Edæ iīne ante wææ āninque tōmengā, “Mǎnōmaī cæmīni ininque mīnitō watapæ quēwēninque iīmæca wantæpiyæ quēwencæmīnimpa,” ante mā apænegacāimpa.

⁴ Wæmpomīni guiquēnē ēñēedāni. Mīnitō wēnāni wīi āināni bacædānimpa, ante wææ cædinque mīnitō tōmēnāni inānite piīnte cædāmaī iedāni. Wæætē, Mōnō Awēnē wææ aadinque mōnō imonte pāninque odōmonte apænecampa, ante adinque mīnitō tōmengā nānō cæi bai adobaī cædinque wēñænāni inānite ædæmō wææ aadinque mōnō Awēnē nānō apænedō ante odōmonte apænemīni ate tōmēnāni waa pæcædānimpa.

⁵ Waodāni mīnitō imīnite ō ænāni inte tōmēnāni beyænque cæte nē quēwēmīni iīnōmīnite apænebo ēñēedāni. Iīmæca mīnitō awēnēidi inānite mīnitō waa adinque guīñente wædinque tōmēnāni nāni ānō ante ēñente cæedāni. Mīnitō Codito angā ēñente mīmōnē nō pōnente cæmīnitawo. Ininque edæ iīmæca awēnē angā ēñente edæ adobaī mīmōnē nō pōnente cæedāni. ⁶ Mīnitō edæ, Awēnē botō imote waa acæcāimpa, ante tōmengā ayongante ēñente cæmīnitawo. Iñæmpa awēnē dæ goyongante adobaī cōwē ēñente cæedāni. Codito botō imote nē godonte Ængaingā ingante nē cæte quēwēmō

imompa, ante pönëningue mīnitō edæ Wængonguī nānō ānōnō ante mīmōnoque pönente cæedāni.

⁷ Mīnitō mīmōno piyænē cædinque iīmaī ante pönente cæedāni. Īmæca awënē ingante cædinque botō wīi waocā beyænque ante cæbopa. Wæætē Wængonguī Awënē beyænque ante botō iīmæca awënē ingante cæbopa, ante pönëningue pæ piñænte bai cæedāni. ⁸ Mīnitō iīmaī ante edæ do ēñēmīnīpa. Mīnitō wacā nānō ò ænimīni inte tōmengā beyænque nē cæte quëwëmīni incæ abæ tawænte ee gote bai nāmā beyænque cæte quëwëmīni incæ mīnitō imīnite mōnō Awënē iñōmō, Bitō ægan-cadō waa cæbīi, ante adinque wæætē eyepæ pōnī pædæ pōnongā ænguimīni imīnīpa.

⁹ Waocā ingante nē ò æmīni guiquënē ēñeedāni. Mīni nē ò ængaināni inānite adobai waa cæedāni. Tōmēmīni Awënē incæ tōmēnāni Awënē adocā inongā inte öönæde owocampa cæmīnī. Tōmengā iñōmō wacā ingante wadō wacā ingante wadō ate pönente cædāmaī ingampa. Mānōmaīnō ante do ēñēmīni inte mīnitō beyænque cæte nē quëwënāni inānite edæ piinte ānīnque edæ pæmēnēnāmaī iedāni.

Tæinta wëñate bai mōnō tæi piñænte ëwocacæimpa

¹⁰ Nōwo iīmaī yewæmōningue botō idæwaa yewæmō-mopa. Mīnitō mōnō Awënē nempo nē quëwënōmīni iñōmīnite tōmengā nānō tæi piñænō pædæ pōnongā ænīnque tæi piñænte entawente quëwëedāni. ¹¹ Mīnitō wææ caquincoo, ante Wængonguī eyepæ pōnī nānō da pōnōnincoo tōmancoo ænīnque wëñate bai cædinque tæi ongōedāni. Edæ mānincoo tōmancoo wëñate ongōñōmīni wënæ awënē, Oda cæcæmīnīmpa, ante nangūi ēñente cæcā incæte mīnitō wæætē oda cædāmaī inte edæ tæi ongoncæmīnīmpa.

¹² Edæ wii waodäni inänite mönō guēadō guēa cæcæimpa. Wæætē wænæidi awēnēidi tönō wænæidi inänite nē änāni iñönänite mönō tōmēnāni inänite wæætē guēadō guēa cæcæimpa. Inguipoga wēmō iñōmō tæi piñænte enempodäni tönō öönædē iñōmō wænæcoo nē wiwa ewocate cædäni tönō mänimpodäni mämō ti gotodoncæ cæyönänite mönō wæætē guēadō guēa cæcæimpa. ¹³ Ìninqe tōmēnāni piinte mämō nāni wiwa cæönæ iinqe bayonte mönō wodii winönāmaï inte tōmēnāni inänite wæætē da godongæimpa. Ante ayæ, Tömää edæ eyepæ cæte ate mönō edæ tæ go wæænāmaï inte adiyæ ongongæimpa, ante cædinque mīnitō Wængongui nänō, Wææ caaquincoo, ante tæinta bai nänō da pönönincoo edæ do eyepæ æninqe tōmancoo edæ da wēñædäni.

¹⁴ Wēñadinque edæ wodii winönāmaï inte edæ næ gongænte tæi ongödäni. Edæ, Tæi wææ caaquincoo, ante pönō tæi pacadeyænte bai cædinque mīnitō Wængongui nänō nō pönēnō entawēninqe adobai nō entawente quēwēedäni. Tæcætawē inō tæineta mīni wææ wodontawēinta ante wēñate bai cædinque Wængongui tæiyæ waēmō nänō cædō ante edæ entawente tæi cæte ongödäni. ¹⁵ Mönō Codito pönō cæcä beyænque mönō godongämæ piyænē cæcæimpa, ante watapæ mönō ēñēnō beyæ pogodo gote apænecæte ante cædinque mīnitō awæncata tæi wææ cæwainta wēwate bai cædinque gänē pönente cæedäni.

¹⁶ Yabæque pōni wææ cæquinta tæinta bai næænte bai cædinque mīni wede pönēnō ædæmō entawēninqe quēwēedäni. Ìninqe nē wiwa cædongä ponte gonga encado bai to piyæncate bai cædinque, Mīnitō oda cæcæmīnimpæ, ante cæcä ate mīnitō mīni wede pönēnō beyænque tōmengä wiwa nänō änō ante edæ ēñēnāmaï incæmīnimpæ. ¹⁷ Ayæ, Ocamō incainta tæinta

baï impa, ante wææ wencate baï cædinque mīnitō Codito pōnō ængā beyænque mīni quēwenguinō ante ænte entawencæmīnimpa. Mīnitō yaēmē wææ næænte baï cædinque Wængonguī Ōnōwoca apæneca ēñēninque nāni yewæmongainta ate ædæmō ēñēninque edæ cōwē entawēedāni.

¹⁸ Ayæ Wængonguī Ōnōwoca ingante ēwocadinque mīnitō tōmengā ingante, Wængonguī bitō cōwē cæcæbi-impā, ante godōmenque nanguī apænedinque ñīne cædāmaī iedāni. Mānōmaī cæcæte ante mīnitō mīimīni ongōninque wæntæte badāmaī inte Wængonguī quīnāni tōmānāni beyæ ante cōwē apæneedāni. ¹⁹ Ayæ botō beyæ ante adobaī apænemīni ēñēninque Wængonguī pōnō cæcā ate botō edonque tedecæboimpā, āmopa. Edæ Codito ingantedō ante wēenēñedē mōnō ēñēnāmaī ingaine ante botō ñōwo watapæ ēñēninque guīñēnedāmaī inte apænebo ēñencædānimpa, āmopa. Mānōmainō ante mīnitō Wængonguī ingante apæneedāni, āmopa. ²⁰ Māñine ante botō wadāni weca nē gote apænebo beyænque ñōwo gæguincamē encaipobo inte wæbopa. Ìninque, Māñine ante nē apænequēnengā inte Pabodo cōwē guīñēnedāmaī inte apæneccæcāimpā, ante mīnitō botō beyæ ante apæneedāni.

Waa quēwencæmīnimpa, ante

²¹ Botō Pabodo iñōmō æbānō quēwēmoo, ante, Quīnō baï cæboo, ante ēñencæte ante wæmīnitawo. Edæ Tiquico mōnō tōñīñacā mōnō nē waadecā ñongā inte tōmengā ñōwo pōninque mīnitō ñmīnite māñinō tōmānō ante apæneca ēñencæmīnimpa. Tōmengā iñōmō mōnō Awēñē nempo quēwēninque tōmengā beyæ nē cædongā inte cōwē nē pōnengā inte ædæmō cæcā acæimpā. ²² Ìninque, Pabodoidi æbānō quēwēnāni, ante tōmengā pōnō apæneca ēñēninque mīnitō wampo pōnēninque

täi piñænte entawencæminimpa. Ante cædinque botö, Ædæmö apænebi ëñencædänimpa, ante tömengä ingante mīnitö weca da godömo pongä aedäni.

²³ Mæmpo Wængongui tönö mönö Awënë Itota Codito mīnitö imīnite waadete pönö cæda ate mīnitö mīni caipæ incæ gänë entawëninque wede pönëninque godongämæ edæ waadete pönencæminimpa, ämopa. ²⁴ Æcänö mönö Awënë Itota Codito ingante cöwë waadete pönente ñimpo cædämaï ina iñömö tömengä ingante Wængongui pönö waadete cæcæcäimpa, ante botö Wængongui ingante apænebopa. Mäninque ante yewämömopa.

Wængongui nänö Apänegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

